

Nunatsinni meeqqat atualinnginnerminni, perorsaanikkut inerikkiartuutaasunik qanoq iliornikkut ulluunerani tamarmik neqeroorfigineqartarnissaat pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq Juliane Henningsen, Inuit Ataqatigiit)

Akissuteqaat

(Ilinniartitaanermut, Kultureqarnermut, Ilisimatusarnermut Ilageeqarnermullu Naalackersuisunut Ilaasortaq)

Naalackersuisutut siunnersuuteqartut Juliane Henningsen, Inuit Ataqatigiit apeqqummut pingaaruteqartumut pillugu qutsavigaara. Naalackersuisut anguniagaraat ulluunerani neqeroorutaasartut nunarput tamakkerlugu pitsaanerulersinneqarlutillu ineriartortinneqarnissaat.

Kisitsisit nutaanerpaat takutippaat meeqqat utaqqisutut allatsissimasut kommunini sisamaasuni katillugit 416-iusut. Kommunikkaarlugillu kisitsisit naatsorsoraanni Qeqqata Kommuniani meeqqat 37-it utaqqisutut allatsissimapput, taakkunanga 34 illoqarfinni, pingasullu nunaqarfinni. Kommuneqarfik Sermersuumi meeqqat utaqqisutut allatsissimasut 150-iupput, tamarmillu illoqarfinningaanerlutik. Kommune Kujallermi meeqqat utaqqisutut allatsissimasut 52-iupput, taakkunangalu 46-ut illoqarfinniillutik, nunaqarfinnilu arfinillit utaqqisutut allatsissimallutik. Qaasuitsup Kommuniani meeqqat 177-it utaqqisutut allatsissimapput, taakkunangalu 143 illoqarfinni utaqqisuullutik, nunaqarfinnilu 34-it utaqqisutut allatsissimallutik.

Soorlu siunnersuuteqartoq Juliane Henningsenip, Inuit Ataqatigiit, nalunnigikkaa, kommunit akisussaaffigaat meeqqanut suli atualinngitsunut ulluunerani neqeroorutininik pisariaqartinneqartunik peqarnissaa, aamma taakkununga meeqperivinnik paaqqinnittarfeqarnissaa.

Naalackersuisut kommunit suleqatigalugit aallartereerpaat nuna tamakkerlugu ingerlanneqartussamik init meeqqat atualernissaat sioqqullugu aamma meeqqat atuarfianni atorneqartut qanoq pitsaassuseqarnerannik nalilersuisitsineq. Ininik atorneqartunik nalilersuisitsineq taanna suliassaqarfimmi tassani nuna tamakkerlugu anguniagassat suliniutissallu pilersaarusiornissaannut tungavissiissaaq, tamatumunnga aamma ilanngullugu sanaartugassat taakkualu aningaasalersorneqarnerannut siunissami akisussaaffiit qanoq aaqqissuunneqarnissaannut. Nalilersuisitsineq 2015 naalernerani naammassineqassaaq. Meeqqanik ulluunerani paaqqinnittarfeqarnermi init pisariaqartinneqartut annertusineqarnissaannut nunaqarfinni illoqarfinnilu minnerni atorneqartussatut 2014-imi 10 mio. kr.-it aningaasanut inatsimmi immikkoortinneqarsimapput, aningaasallu taakkua amerlaqataat aamma 2015-imut aningaasanut inatsisissatut siunnersuummi immikkoortinneqartussatut siunnersuutigineqarlutik.

Ulluunerani meeqqanik sullissinermi ikiortinngorniarnermik ilinniartitaaneq alimasissumi atuartitseriaaseq atorlugu ilinniarneqarsinnaasoq december 2014-imi Perorsaanermik Ilinniartarfimmi aallartinneqarpoq, atuarlernissaq sioqqullugu ilinniartitaanermi Naalackersuisut

anguniagaat aqquissiuunnarlugit, sulisuusut ilinniarsimangitsut perorsaanikkut alimasissumi ilinniartinneqartarnissaat neqeroorutiginiarlugu. Tassanilu minnerunngitsumik nunaqarfinni ulluunerani neqeroorutaasuni sulisuusut siunnerfigineqarlutik.

Ilinniartitaanermut, Kultureqarnermut, Ilisimatusarnermut, Ilageeqarnermullu Naalackersuisoqarfik, KANUKOKA aamma Inerisaavik suleqatigalugit atualernissaq sioqqullugu suliassaqarfinni paasissutissanik katersillutik aallartippat, nalilersinnaajumallugu maanna sulisoqarnikkut aaqqissuussineq pissusissamisoornersoq. Sulisoqassuseq ataatsimut 2015-imi naammassillugu nalilersorneqassaaq.

Juliane Henningsenip apequtigaa ”meeqquvikk tamanut atuuttoq”, taamatullu aaqqissuussineq qanoq akeqassanersoq:

Meeqquvikk tamanut atuuttumik ”børnehaveklasse”-mik oqarnermi eqqarsaatigineqarpat meeqqanut suli atualinngitsunut tamanut neqerooruteqartoqartariaqartoq, tamatuminnga ingerlatsinermut ilassutitut aningaasartuutissat ukiumut 100 mio. kr.-it missaanniissappat. Meeqqallu 1.500-ut tamatumani inissaqartinnissaannut sanaartugassanut aningaasartuutit 300 mio. kr.-it missaanniissallutik. Aningaasartuutissat siuliani oqaatigineqartut tamatumunnga naapertuuttumik annikinnerusinnaappat tamanut atuuttumik ”børnehaveklasse”-mik oqarneq taamaallaat meeqqanut tallimat arfinillillu akornanni ukiulinnut tunngatinneqassappat, taamalu ukioq atualerfissaq sioqqullugu ukioq ataaseq pineqarsimappat.

Eqqarsaatinut uani pineqartunut tunngatillugu oqallinneq soqutiginarluinnartoq takusinnaavara, neriutigaaralu oqallinneq aningaasartuutaasinnaasutut eqqaaneqartut tunngavigalugit ingerlassinnaagippat, taamaaliornitigullu oqallinneq inuiaqatigiinni tulleriarinermut annertunerusumut ilaatissinnaagippat. Siunnersuuteqartut oqallinnissamut saqqummiussaannut qujavunga, qilanaaraaralu partiit isumaasa apeqquutinut uani pineqartunut tunngatillugu tusarnissaat, tamassilu imaqluurtumik oqallinnissamik kissaappassi.